

### **Gagnaöflun vegna 3. áfanga rammaáætlunar um R3XXXXXXXXXX**

Ráðuneyti umhverfis- og auðlindamála hefur gefið út reglugerð nr. 530/2014 um virkjunarkosti í verndar- og orkunýtingaráætlun (rammaáætlun), sem birtist í B-deild Stjórnartíðinda 5. júní sl.. Reglugerðin nær til landssvæða þar sem er að finna virkjunarkosti til orkuvinnslu og byggir hún á lögum nr. 48 frá árinu 2011.

Orkustofnun kallaði haustið 2013 eftir beiðnum um að verkefnisstjórn fjalli um virkjunarkosti í samræmi við 9. gr. laganna. Samkvæmt þriðju grein reglugerðarinnar þurfa ýmis gögn að fylgja beiðni um umfjöllun um virkjunarkost og eru gögnin mismunandi eftir því um hvers konar virkjun er að ræða.

Rétt er að taka fram að Orkustofnun telur við nánari athugun að lög nr. 48/2011 nái ekki með ótvíræðum hætti til vindorku eða sjávarfallaorku utan netlaga. Því verða vindorkukostir ekki sendir verkefnisstjórn til röðunar í 3. áfanga rammaáætlunar, en aðeins til upplýsingar þar til lögum kann að verða breytt.

Orkustofnun sendir einungis þá virkjunarkosti til verkefnisstjórnar sem stofnunin telur vera nægilega vel skilgreinda. Stofnunin hefur unnið leiðbeinandi upplýsingar um hvernig skilgreina skuli virkjunarkosti. Þessar leiðbeinandi upplýsingar eru fyrstu drög að þeirri skýrslu sem skilað verður til verkefnisstjórnar 3. áfanga rammaáætlunar.

Á vefsvæði sem fram kemur hér að neðan er að finna eyðublöð á „excelsniði“ fyrir mismunandi virkjanakosti í vatni og jarðvarma sem send verða í kjölfar þessa erindis til orkufyrirtækja með tölvupósti. Einnig er að finna almennar upplýsingar um Excelskjölin og útfyllingu á þeim. Stofnunin hefur gefið eyðublaðsformunum sem send eru til orkufyrirtækjanna nafn í samræmi við númerakerfi stofnunarinnar á virkjanakostunum þannig að eyðublöðin séu réttilega auðkennd hverjum virkjanakosti fyrir sig (sjá nánari upplýsingar í skjalinu Excelskjöl til gagnaöflunar frá orkufyrirtækjum).

Farið er fram á að orkufyrirtækin kynni sér til hlítar öll þau gögn sem finna má á vefsvæðinu:

<http://www.orkustofnun.is/raforka/rammaaetlun/upplýsingar-um-virkjunarkosti>

Nauðsynlegt er að fyllt sé út í alla reiti á eyðublöðunum í Excelskjalinu sem orkufyrirtækin fá send í tölvupósti. Útfylltu Excelskjali skal skila til Orkustofnunar í tölvupósti á netfangið [rammi3@os.is](mailto:rammi3@os.is) ásamt pdf útgáfu af sama skjali sem sýnir innihald þess eins og það var þegar skjalið var sent. Einnig skal að lágmarki skila stofnuninni korti eða skýrslu með korti sem sýnir tilhögun virkjunarinnar á skilmerkilegan hátt. Farið er fram á að orkufyrirtækin sem óskað hafa eftir umfjöllun um virkjanakosti vegna 3. áfanga rammaáætlunar skili inn fullnægjandi gögnum eigi síðar en 31. desember 2014.

Ef einhverjar spurningar vakna varðandi verkefnið má hafa samband um netfangið [rammi3@os.is](mailto:rammi3@os.is). Öllum fyrirspurnum verður svarað og spurningar og svör verða jafnframt birt á vef stofnunarinnar.

U.þ.b. tveimur vikum eftir dagsetningu erindis þessa verður boðað til fundar þar sem farið verður í gegnum gögnin á vefnum auk þess sem boðið verður upp á umræður um gagnaskilin, æskilegt væri að orkufyrirtækin tilgreindu fulltrúa sinn á þann fund með því að senda upplýsingar um viðkomandi á netfangið [rammi3@os.is](mailto:rammi3@os.is), svo að fundarboðið misfarist ekki.

Orkustofnun áskilur sér rétt til frekari gagnaöflunar eftir því sem þurfa þykir.